

MONON : ON SINT QUI R'WAITE A VOS !

Tos l's-ans, li dîmègne après l'Assinsion, lès cinsîs d'Ârdène èt co pad' là, si r'trovenut al coléjjiale di Nassogne po, come on dit véla, lès 'R'muwadjes' di sint Monon. Dispû dès siékes, on vint dîre sès pâters addé li po d'mander protècsion po lès dinréyes èt lès bièsses dèl cinse.

*Ô Monon, grand sint d' Nassogne
Dès grossès bièsses, purdoz sogne !
Èt d' l'awin.ne, li wadje ou l' frumint
Po nos garanti dès bias rindemints.*

Ci djoû-la, lès djins vègnenut avou dès couchas èt frotenut l' châsse do sint avou leûs fouyes. Cès bènités cochètes la, lès cinsîs lès mèteront dins leû stauve. Insi lès bièsses sèront foû dès côps tote l'anéye.

Al cinse d' Hérumont, do timps d' l'iviêr, on-z-aveûve vindu d'abôrd tos lès cus d' polin. Èt au martchi d' Cîné on-z-aveûve sitî acheter fwârt tchêr one dozin.ne d'aumayes. Mins dispû dès mwès, nin moyin d' lès-awè plin.nes. Li cinsî aveûve bin fait v'nu l' vétérinaire saquants côps, èt l'ârtisse, li, il aveûve priyî lès syincieûs do CER di Marlôye èt lès cias d' Cîné po comprinde çu qui s' passeûve. Il ont d'abôrd pinsé qu' c'esteûve li difaute do gayèt. Non.na, ô ! Il ont r'waîtî aus-amougnîs èt à one ôte masse d'afaires. Mins, broke di viole, rin n'a candjî. C'esteûve on vraî maleûr, la waî, qui tchèyeûve su onk dès mèyeûs stauves di tot l' payi. À crwêre qui l' diâle aveûve passé avaur-la !

Al difin, on-aveûve bin causé d' sint Monon. Mins l' cinsî, su dès tchôdès breûjes, a rèspondu platèzag : « Dji n'irè nin. Dji n' crwè nin à totes cès bièstrîyes la, mi ! C'est totès carabistouyes, vos di dj' ! »

On djoû qui l' pus gros dès bèsognes avêuve sitî fait à campagne, sins-è causer à s'-t-ome, li cinseresse a stî j'qu'addé l' sint : « Si ça n' fait pont d' bin, ça n' pout pont fé d' mau, don ! »

Èle mousse dins l'èglîje èt, pâr chance, èle tchaît su on curé qu' apwarteûve dès novias papîs

« Mossieû l' curé, dji so binauje di vos rèscontrer. Èwou ç' qui dj' pou trover l' sint qu'on priye po lès bièsses ? »

« Véla pad'vant, à costé do prumî pilé ! Vos vèyoze ? »

« Ah, oyi ! Mèrci savoz, Môssieû l' curé ! Dji n' rovîyerè nin one pitite pâter por vos ! »

Li dwèyin, avou on laudje sorîre, sondjant à ç' qui l' feume vint d' lî dîre, lî rèspond : « C'èst fwârt djinti ça, Madame, di sondjî insi à mi ! »

Quéne chance, vos ! Gn-a nin qu'aus grossès bièsses qui sint Monon r'waîte !

Bernard Van Vynckt

* Remuages : nom donné à la procession qui, de la collégiale à la chapelle qui lui est dédiée, pèlerine avec la châsse de saint Monon.

* Couchas : branches qui reverdissent au printemps.